

## 第四屆「金筆獎」中文硬筆書法比賽

### 抄寫內容（中學組）

#### 初中組

##### 節錄《禮記》、《孟子》、《中說》及《荀子》

誠，五常之本，百行之源也。靜無而動有，至正而明達也。

所謂誠其意者，毋自欺也。如惡惡臭，如好好色，此之謂自謙。故君子必慎其獨也。

誠者，天之道也；思誠者，人之道也。至誠而不動者，未之有也；不誠，未有能動者也。

推之以誠，則不言而信；鎮之以靜，則不行而謹。

君子養心莫善於誠，致誠則無它事矣。



## 高中組

### 節錄《荀子》

君子養心莫善於誠，致誠則無它事矣。唯仁之為守，唯義之為行。誠心守仁則形，形則神，神則能化矣。誠心行義則理，理則明，明則能變矣。變化代興，謂之天德。天不言而人推高焉，地不言而人推厚焉，四時不言而百姓期焉。夫此有常，以至其誠者也。君子至德，嘿然而喻，未施而親，不怒而威。夫此順命，以慎其獨者也。善之為道者，不誠則不獨，不獨則不形，不形則雖作於心，見於色，出於言，民猶若未從也；雖從必疑。君子養心莫善於誠，致誠則無它事矣。

